

Enformaziuns y Comunicaziuns



Rorati: Šën d'Advënt sarál le lõnesc y le vëndres ales 19:30 i Rorati. Deache al val ciamó cina en jöbia la limitaziun che an pó ma rodé cina ales 20:00, é la jont co vá a Rorate en lõnesc periada da se tó l'autozertificaziun, scrienn sö l'orar dla funziun. Con le vëndres ai 4 de dezëmber pón endô sté alaleria cina ales 22:00.

Ponsiers d'Advënt/1 - online: Le „Haus der Familie“ mêt da jí vigne sabeda d'Advënt ales 18:00 na picia funziun d'Advënt arjignada ca da signor Tone Fiung. Al sará musiga, meditaziun, ponsiers y impuls por le tomp d'Advënt. Le pröm iade él ai 28 de novëmber. An pó tó pert sön cösta misciun: www.facebook.com/hausderfamilie.ritten

Ponsiers d'Advënt/2 - online: Vigne domëgna d'Advënt él la Uniun Teater La Val co pîta en picio video sön sù canai Youtube y Facebook, dales 17:00 ennant. Plü avisa les domëgnes ai 29 de novëmber, ai 6, 13 y 20 de dezëmber. Al é en envit da s'archité y sté en pü' adöm, con stories, rezêtes de checs y ponsiers lominusc.

Comun: Le Comun de Mareo lascia alessëi che da cöst'edema ennant é le zënter de reciclaie endô davert ince le dedemesaledema dales 14:00 ales 16:30.

Le Vësko mêt a cör cis šën d'Advënt da perié les Anmaries

„Les Anmaries toca bën ples oraziuns plü beles y plü conesciüdes. I podun les capí y perié desco en ressumé dla fede cristiana. Dal 13ejimo secul encá vëgnel soné „l'Anmaria“. Les ciampans nes enviëia vigne dé da doman, da misdé y da sêra da se tó dlaorela y da medité con Maria le mistêr dl'incarnaziun de Dio.

Perié ó dí se tó dlaorela por: I s'architun y lasciun ia ci che i sun tal fá. I se dauriun a Chël Bel Dio. I s'intenun: ÈL é atló. Döt mêt man con cösta posiziun.

Perié ó dí aldí: Sant Agostin dij de Maria: „Ciamó denanche conzepí te so corp, ára conzepí te sôa orëdla“. Ascuté con atenziun. Aldí fora Chël Bel Dio y sôa parora danter dotes les atres usc da vigne dé. Jí con Maria le tru dl'incarnaziun de Dio.

Perié ó dí dé resposta: Maria á dé so 'poa' desco resposta – zonza sêi ci co ti aspetâ, mo confidenn – cina sot la crusc de so môt. Ara resta pa so 'poa' che ara á dé.

Perié ó dí avëi crëta: Chël Bel Dio sá de nos. Degün destin verc ne comana de nosta vita, nosc dagní n'é nia tles stêres. Nos sun pert dla storia salvonta de Chël Bel Dio. Tres Gejú Crist, le môt de Chël Bel Dio y le môt de Maria, s'á motü Chël Bel Dio por tres sön nosta pert. Al é sön tru con nos y nes vá danfora: tres la crusc ala ressozeziun.

Perié ó dí azeté l'enciaria de Dio: Ince a me mo dij Chël Bel Dio desco a Maria: 'I t'adori!' Le miraco dl'incarnaziun de Dio sozed enló, olache al s'encunta le 'poa' de Chël Bel Dio con le 'poa' dla porsona. Tla plëna liberté nes nascel tó la dezijiun por la resposta che i ti dun a sôa domanda, sce i azetun sôa enciaria.

I enviëii düc canc da proé da se tó dlaorela con les Anmaries: dala pröma domëgna d'Advënt cina en Vëia de Nadé. Magari vëgnel spo na bona üsanza da vigne dé, co nes acompagnëia döt l'ann. Les Anmaries pón perié endlunch: dertan le cujiné, te bus, da jí con l'auto, da jí a spazier, t'en salf da aspeté, desco oraziun pa mësa, da na sentada..., dassú o dassora o ince deboriada con d'atri, dadalt o ince daplan. Ara se trata de na spiritualité da vigne dé.“

Osc Vësko Ivo Muser



Plata dla Ploania Al Plan de Mareo San Vigile

Ploan: Signor Klaus Sottsas
E-Mail: ksottsas@rolmail.net

Calogna Al Plan: 0474 501006
Radio de Ploania: 93,00 MHz

UNITÉ PASTORALA



VAL BADIA

www.unitepastorala.org

Ann B 29.11.2020 - Pröma Domëgna d'Advënt - ann liturgich nò nr. 1

Cí y tera passará, mo mies parores ne passará nia



Dal Vagnele do San Merch 13, 24-37

Gejú ti á dit a sù discepu: ²⁴En chi dis, do la gran tribolaziun, s'ascürará sorëdl, y la lõna ne dará nia plü; ²⁵les stêres tomará dal cí y les forzes dal cí gnará scassades decá. ²⁶Spo odarán le Fi dal Om gnenn söi nii con gran potënza y gloria. ²⁷Y al menará fora i agni y abinará adöm chi ch'al á prelité da dotes cater les direziuns dal ont, da foransom la tera cina sönsom le cí. ²⁸Emparede val' dal confrunt con le lën da fighi! Pornanche söes rames vën vërdes y pëta fora fëia, sêise che l'isté é dampró. ²⁹Avisa ensciö desses capí, canch'i odëis che döt cant cösc é tal sozeder, che la fin é dan porta. ³⁰Amen, i ves diji: Cösta generaziun ne passará nia, cina che döt cant cösc ne sozed. ³¹Cí y tera passará, mo mies parores ne passará nia. ³²Mo degügn ne conësc chël dé y chë ora, no i agni dal cí, y gnanca le Fi, ma le Pere. ³³Metede averda, y stede muntri! Deach'i ne sêis nia, canche le tomp é atló. (...) **Parora dal Signur.**



Les Anmaries



L'agno dal Signur á anunzié a Maria.
Y èra á conzepí por opra dl Spirit Sant. **Ave Maria...**
Maria á dit: lu sun la fancela dl Signur.
Al sozedes con me desche t'as dit. **Ave Maria...**
Y la Parora de Dio s'á encarné.
Y á abité danter nos. **Ave Maria...**

Prëia por nos, santa Oma de Dio, ch'i gnunse dëns de ci che Gejú Crist nes á empormotü.

Periun! Dio onipotënt, jüta ete tóa grazia te nüsc cörs. Con l'anunziaziun dal agno áanse conesciü l'incarnaziun de Gejú Crist, to Fi. Fa ch'i gnunse dëns, por i miric de sôa pasciun y mort, da roé ala gloria dla ressozeziun. Por Gejú Crist, nosc Signur. **Amen.**

Oraziun dal dé



Periun!

Oh Dio, nosc Pere,
döt stá te tóa potesté:
endespra te nos la orenté
da ti jí con de bones
operes adencuntra a Crist
co é tal gní, por ch'al
nes chërdes a tó ete
le post a sôa man dërta,
canch'al gnará tla gloria.
Èl, co é Dio y vir y regnëia
con te tl'unité dal Spirit
Sant, por düc i
secui dai secui.
Amen.



Gherlandes d'Advënt: Te cösta pröma domëgna d'Advënt vëgnel tignì pla Gran Mëssa la benedisciun dles gherlandes. Ares vën benedides te dlijia, y deache al é cösta situaziun, ince tres le radio.

Edema liturgica dai 29.11. ai 06.12.2020	
DOM 29.	Pröma domëgna d'Advënt <i>Friedrich, Iolanda, Jutta</i> Domëgna dla dlijia te ciasa
08:30	S.M. a La Pli
9:30	Corona por +nt Cristiano Comploi
10:00	Gran Mëssa por döta la ploania <i>oferta por la ploania</i> LAD S.M. por les Families con benedisciun dles ghirlandes d'advënt 3. Requiem por +nt Cristiano Comploi por +nc' fredesc Loise, Elsa y Sivio Taibon, Lé dla Crëda +nt Albert Mutschlechner dal Pech de rengr. por Fam. de Tone y Annamaria Complojer
→ 19:00	les ciampanes sona ete l'Advënt y enviëia al'oraziun te familia
Lön 30.	fiesta de Sant'André apostul
19:30	Rorate por +nc' Baldanello Renzo, Elisabeth Auer Erlacher y Comploi Cristiano <i>(Linda)</i> DEU S.M. de rengr. por Fam. Castlunger da Grones por +nc' Maria y Franz Comploi de Clara
Ded 01.	<i>Natalia, Natalie, beat Charles de Foucauld</i>
19:00	Corona
Dem 02.	<i>Luzius, Bibiana</i> Vijita personala te dlijia y cortina
Jöb 03.	<i>Franz Xaver, Emma - de d'oraziun do vocaziuns</i> Vijita personala te dlijia y cortina
Ven 04.	pröm vëndres - Barbara, Jan da Damaskus, beat Johannes Nepomuk von Tschiderer, beat Adolph Kolping
19:30	Rorate por i Jogn y Artejagn <i>(Mosaic)</i> LAD +nt Luca Schuen S.M. por +nta Emma Videsott
Sab 05.	<i>Anno, Reinhard</i>
17:30	Corona
18:00	Rorate por l'UML y por la Scora <i>(Uniun Maestri Ladins)</i> ITA +nt Pietro Paulini S.M. dal ann por +nt Pire Kaneider +nc' Lore y Robert Kehrler, Longega
DOM 06.	Secunda domëgna d'Advënt <i>Mocherá, Klaus, Nicole</i>
08:30	S.M. a La Pli
10:00	Gran Mëssa por döta la ploania <i>oferta por la ploania</i> LAD por +nc' da Pinei – nta Maria Trebo de Pire +nt Franz Pitscheider - +nt Franz Kanetscheider

Advënt

Nos aspetun, mo nosc aspeté é speranza.

(Friedrich von Bodelschwingh)

Da coraje y acorc

Les ciandères dla gherlanda d'Advënt te ciasa é löms de speranza. Ares é ince en sëgno de nosta desponibilitè da fá le monn luminus; che val'cosses podéss nes scialtrí. Le temp d'Advënt nes píta en program spiritual de encorajamont. Nos jun le tru dal popul d'Israel, che dla desperaziun y dal alontanamont de Dio ciafia empó endò crëta tla bonté dal Signur. "Y empó éste tö, Signur, nosc Pere. Nos sun l'arjila, y tö le vasá; nos düc sun l'opera de töes mans." (1a letöra)

Paul scii ai Corinc dla fedelté de Chël Bel Dio: "Èl ves fajará ince stersc cina ala fin ... " (2a letöra)

Le Vagnele nes porta con la pilora dai fanc acorc a na desponibilitè nea por le Nadé dal Signur.

I ponsun do:

I ne savun nia canche Idio nes cherda a dé cunt de nosta vita. Al pó belo ester endoman; al pó ince ciamó döré trec agn. Emportant éd madër, che i adempiunse nosc dovëi, che le Signur nes á assegné, y ch'i sunse entres arjignés por Èl. Cösc ó dí: vire do söa orenté, scinché amur, chirí comunité, renforzé la speranza, y ensciö belo cambié en pù le monn.

I periun:

Dio onipotënt, te Gejú Crist aste belo motü man, da cambié le monn. Tal scomenciamont dal Advënt te periunse: Láscesse ester acorc a töa orenté y fá fora de nos colaboradusc y colaboradësses plëns de coraje por to Règn. Por Crist, nosc Signur.

(Sonntags-Bibel dal Vësko Wilhelm Egger)

Das ist der größte Ernst und
die größte Seligkeit
der Adventsbotschaft.
Christus steht vor der Tür,
er lebt in Gestalt des Menschen unter uns,
willst du ihm die Tür verschließen oder öffnen?

Dietrich Bonhoeffer



Erster Advent

Sorvisc dai Ministronc

Lönesc 30/11 (19:30h), Vëndres 04/12 (19:30h): Chantal y Melanie Feichter;

Sabeda 05/12 (18:00h): Lisa y Marco Alberti;

Domëgna 29/11 (10:00h): Valentina Erlacher, Pia Videsott

